

Fasnacht 2026

Blagèèr!



e VSG Bangg

S'Hemli isch verisse und s Portmonee wägg.
Under em lingge Aug isch blaue Flägg.
D'Brülle isch kabutt und e Zahn hett e Schaade.
So gohts, wenn de im Joggeli gosch go baade

Fremdi Arte sind e grossi Bloog.
Käfer, Tigermugge, die usem Wassertroog.
Die schlimmschti Art aber, ich saags riguroos:
triffsch z'Nacht im Glaibasel uff dr Stroos.

S'isch verbii mit de fette Joor.
Alli mien spaare sisch doch woor.
S'Theater Basel suecht drum magersüchtigi Lyt.
Die muesch nit verpflege, die ässe jo nyt.

Yber d'Amipolitik duet die ganzi Wält flueche.
D'Misere isch do, mir sind am d'Ursach suche.
Jetzt hemmer si gfunde und sind entsetzt.
S'hett ain fyr de Trump mein Kampf ybersetzt

Mitere Gritte fahr i dur d'Gegend, will e bitzeli schmuuse.
Drum fahr i uff e Parkplatz uuse.
Nach fünf Minute goot si ohni e Gruess.
Kuum deham kunnt vo Birsfælde e Buess

Mi Schaidig isch e totali Kataschtrofe.
Mi Frau bikunnt mi Huus, s'Gäld und Goofe.
Ich bi so blööd das ha ich dervoo.
Ich ha mi vo dr Karin Käller-Sutter beroote loo.

Gege der Klimawandel isch di ganzi Wält am kämpfe.
Zum die Hitzewälle kenne z'dämpfe.
Basler hän d'Löösig do sin mir platt.
Kai Drämmli me durch d'Innestadt.

Holtrio in Moll und Dur.
Joodle isch jetz Wältkultur.
Mir schaffe jetzt mit aller Kraft,
dass Zircher s'Säggsilyte nit au no schafft.

D'Autinummere z'Züri dien d'Million überstiige.
Wie kasch sovil Zahle uffs Nummereschild biige.
S'brucht brait Schluder hinde und vorneduure.
Das passt doch guet zu dr Züürischnuure.

Willsch z'Basel sperrigi Lasten transportiere,
muesch so e Kistevelo organisiere.
Numme d'Schwiigermamme die duet bogge.
Si will aifach nitt in die Kiste hogge.

Wottsch au by uns bänggle?
Uff www.vsg-basel.ch erfahrsch meh!



Fasnacht 2026



Kaffidante

Es ergit sich zunnere Zit – im e Land soo wit und fäärn
E ganz hälls Liechtli wiist dr Wääg, im Folge alli gäärn
Es wird frohloggt, d'Glogge lütte – und e Ängel singt
So bassiert, wo d'Schwiz (Fifa) im Trump –
d'Arschkriecher-Gschänggli bringt

Mi Maa isch e bitzli schusselig – und au nit graad e helle
D Brimaarschuel hett är grad so gschaft – vom räscht wott i nüt verzelle
Är ka nit viil, und das nit guet – hett zwäi linggi Händ
Mit so Fähigkaite, s isch verruggt –
wiirsch z'Ameerika zwäi moll Breesidänt

D Faasnacht isch, und das sit kurzem – schützenswäärti Wältkultur
Unveränderlig, so wie si isch – do isch d'UNESCO zimlig stur
Jetz gits am Zyschtig, käini Waggiswaage – au d'Chaise wäg – so ne saich
Kä Rädäbäng mee uff Bapiir – und gлии spiile Gugge am Moorgesträich

Mi Alt däa raucht wie e Schloot – und männgmool duet är Kiffe
Drum weis är jetz scho, wie me s'Rauchverbott –
im Joggeli ka ummschiffe
Ganz noi het är, in dr Muttenzerkurfe – e tholle Blatz, aber wie
Döört ka är denn – weenigschtens – dr Rauch vo de Pyro's iinezie

Mi Noochber isch e riise Blagööri – und mäint, är siig dr Gröösch
Blöff mit siine Frauegschichte – haut's jede Oobe in d'Mööscht
Geschter hett är welle, in d'Luxusfeerie, isch am Euro-Airport blyybe hange
Ich ha drum Dehäi e Drohne gstaartet – denn isch am Airport nüt me gange

Mi Maa dä ka jetz wiirgglig nüt – das wüsse mir bereits
Är suecht scho lang was är denn könnt – vilicht au öppis zwäits
Jetzt hett är doch, e Uffgoob gfunde – wo au är verstoot
Är isch drumm jetzt, wäär hättis dänggt – neu im Bundesroot

I verzell euch jetzt e kuurzi Gschicht – vom Schälletramper Hampe
Faahrt s'Trämmli nümme duur d'Innerstadt – ka är si Schälle nümme drampe
Är suecht sich drum, e noie Job – loot dr Kopf nit lampe
Är isch noi e Fuessballprofi – döört ka är witer in Schälle drampe

Mi Maa und ich gniesse s'Lääbe – das hään mir uns verdient
Mir mache nüt was Anderi wän – mache nütme, was mr mient
Mir chille jetzt, dr ganzi Daag – und dringge ei, zwäi Fläsche
Und all Wuche kunnt Dehäi – dr Marco Odarmatt go wäsche.

Wottsch au by uns bänggle?
Uff www.vsg-basel.ch erfahrsch meh!

Drugg: Amerbach'sche Druckerei, Basel



Fasnacht 2026

SCHNAPS BAGGE

In dr Uni-Mensa isch vegaan Drumpf.
Drum züchtet me vor em Yygang e Raase,
dass die Studierende, in dr Pause, kenne zämme go graase.
Dr Tryybhuusgas-Usstoss im Hörsaal isch übel,
das muesch gseh.
Also, ych find, dä Raase isch e richtigi Furz-Idee!»

Dr verstorbeni Papscht hett Fuessball gärn gha,
är hett's betont uff sine Raise.
Es tuet z'Argentinie sone Betonschüssle
«Estadio Papa Francisco» haisse.
Wurde d'Franzose e Stadion noch em
russische Präsident nenne welle,
täte si in ihrer Ussprooch vom «Stade Wladimir PUTIN» verzelle.

Wenn mi Sohn amene Match im Joggeli
muess s'glaine Örtli uffsueche,
kunnt's öfter vor, dass dr FCB grad denn e Kischte tuet bueche.
Ych ha mir eppis yberleggt,
aber ych will nit ybertrybe.
Ych kennt ihn empfähe, är sell dr ganz Match
uff dr Schissi blybe.

Bi Verhüürotete isch s'Demänzrisiko grösser,
e Studie häb's bewise.
Do bin ych als Ehemaa nit yyverstande,
au elaistehend hesch dini Krise.
Ych find das jo schreggig, wenn epper die Grangget hett,
will ych föhl mi no fit,
ha aber au scho gwynscht, ych könnt sage:
«Die doo in dr Kuchi, ych kenn die nit»?!

Ych ha vo dr SBB e Mail griegt;
fir mi Halbtax startet e Aggzion.
Zem sich vor Betrug z'schütze,
gäb's «d'Zwai-Faggtore-Identifikation».
Zuesätzlig zu dr Gsichtserkennig
bruuch's eppis Glyychwärtigs, denn sig ych registriert.
Do han ych d'Händykamera an s'Füdle ghebt –
und scho hett's funggzioniert.

Mi Frind Guschti nimmt am Mimösli kai Sandwich,
au am Charivari isst är nyt.
Am Källerstrach sufft dä Wasser,
am Fasnachtsbändeli kai Schämpis brut.
Au am Lägerli nimmt är kai Käskiechli,
d'Frau sait, är sig z'digg, das tuet em weh.
Jo, wenn dä vor sich aabeluegt,
ka är – wäg sim Drummeli – s'Pfyfferli nimmi gseh.

Es git Bruefsbezeichnige: Master of construction in fresh air,
dasch e Muurer, das merggsch glyy.
Dispatcher of not good smelling things,
das derft Ain vo dr Kehrichtabfuehr syy.
Bachelor of Shit House repair isch e Sanitär – kai Froog.
Und denne no: Supervisor of Asshole Kids isch au glaar,
dasch e Sozialpädagog.

Ych ha gläase, e Chines, wo z'Ziri studiert,
läbt vo Gratis-Aperos und Katzefueter.
Ych ha e Zircher gfrogt, ob dä das wirggig so macht,
dä sait mir: «Jä das tuet är».
Jetzt kunnt är go ässe bi dr Schwiegeramsle,
denn hett är kai Beschaffigs-Drugg
aber, so wie die kocht, goht dä nochhär zem Katzefueter zrug.

E wichtigi Studie sait – ych waiss nit,
ob ihr das wisse wänd,
nur d'Helfti vo allne Lyt wäscht sich
nocheme Stuhelgang d'Händ.
Das sig wirggig eso, do gäb's gar nyt dra z'rüttle,
jetzt tue ych halt numme no jedem Zwaite dr Pfoote schüttle.

Dr Trump lyttet dr Frau Käller-Sutter aa: «Loos Maitli,
ych ha dir's nonig gsait;
Wie ych di letscht Summer am Delifon aabebutzt ha,
das tuet mir laid.
Während unserem Gspröoch bin ych abglänggt gsi
und e weeneli irritiert.
Dr Infantino hett mir grad mit dr Zunge s'Hinterdail massiert».

Wottsch au by uns bänggle?

Uff www.vsg-basel.ch erfahrsch meh!



Fasnacht 2026



Nachtschwärmer

Mir sind doo, zem Schnitzelbangg singe
Mir wärde Eych zem Lache bringe
Wär nid lacht, erliidet Gwaale
Dää muess e huffe Strooffzoll zaale

By kirzlig mool, s'isch als no glatt
Go läädele, in d'Innerstadt
Ha denne gstuunt, was isch basiert
Es wird grad niene demonstriert

Fir 100 Stutz, loos, hösch Digge
Hesch als im Buff könne ... ligge
Fir 100 Stutz, dasch e Glaare
Kasch jetze duur Birsfälde faare

Mir händ gmaint, es syg exzellänt
Und mache Ferie, im Oriänt
Händ glyy gmerkt, s'isch fir d'Katz
Kasch grad so guet, zem Claarablatz

Dr Trump gheersch, neyme duure
Ständig Schissdrägg umme schnuure
Äär schwyygt numme, in dr Noot
Denn, wenn's umme Epstein goot

SBB bstellt Züüg, es isch frappant
By Siemens, statt eme Schwizer Lieferant
Immerhin, het d'SBB verzellt
Händ sy nid bi Temu bstellt

Dr Trump het e Doggter bsuecht
Wo si Biire untersuecht
Dr Doggter maint nur, scho no dumm
Es git kai Mittel gääge Vakuum

Mir könne uns, wie die maischte
D'Granggekassee nimme laische
Mir händ dänggt, daas darf nid syy
Und sind kurz bim Louvre verbyy

Dr Sarkozy dä glaini Zwuggel
Muess in d'Kische, nundebuggel
Ass äär nid abhaut, das isch schitter
Bruucht sy Zälle e Fliege-Gitter

Bisch sälber nid soo intelligänt
Hilft Dir KI, permanänt
Mit KI wott i, do wäär i froo
Ändlig könne Fraue verstoo

Wottsch au by uns bänggle?

Uff www.vsg-basel.ch erfahrsch meh!



Fasnacht 2026



Mini Vers, wo i sing, sind vom Intellekt her perfekt,
es fehlt enä nur dä recht Dialekt.

Uff em Barfi und Määrt: Kai Tram und kai Kaare,
derfiir no mee Weloo, wo aim überfaare.

Dr -minu isch wirgglig e wunderbaar Wääse.
Wäär wuurd ohni ihn denn die BaZ ächt no lääse?

Dr Rösti üse Bundesrot, – politisch schräg, amorph
tribt grinsend, fründlich per Dekret, – dräckigi Säu durchs Dorf.

Do kämpft d Frau Martullo für Boode und Bluet.
Iir Gschäft mit em Export, das läuft jo no guet.

SVP hetts saustreng mit ihrne Hellebarde-Feschthli.
Sie beschütze dört statt üsi Schwyz, – ihri Hirnsynapse-Restli.

Herr Schwarz und Herr Wyss hänn für alli Fäll
sich umdauff, und haisse jetz Dunkel und Häll.

Es hett nöd glengt für de Nobelpris, – de Trump find da nöd nett.
Bi Pädophile het jo er zum Troscht – en Epstei-Stein im Brett.

Vo nünedrissg uf fufzeh abe, – schleckt üssi Wirtschaft sich zur Wehr.
Geiler wär doch 69 – für no meh Oralverkehr.

Bisch grad intrinsisch motiviert, min Sohn,
möchts pädagogisch nöd versuume.
Falls de Luscht hettsch, denn chönttisch no
dis Gschirr vom Tisch wegruume.

Dr Gianni tuet sin Donald, – mit eme Friedenspriis ideocke.
Nöd mol z'Parfüm vo dr Heidi Kulm, – cha so viel Scheiss abschmecke.

Dr Kim und dr Putin sinn Speezi vom Xi.
Und jetz isch döört au no dr Ueli derbyy

Jetzt längts. Und i due mi uff e Sääntis verzie.
I leer jo das «Baaseldytsch» s Lääbe lang nie!

Uff Keller-Suter isch er hässig, – sie het dem Trump en Rotschlag ge:
Er söll doch vor em WEF z'Davos, – es heisses Chlorbad neh.

A üser Grenze git's nüt z'schmolle, – für de Trump de Tatterbolle
Denn eigentlich het er solle, – si Gammelfleisch verzolle.

Goht die Abstimmig denn in d'Hose, – fangt denn z'Kesseli a rünne
E halbe Radio, halbe Fernseh, – gits bi SRF denn z'gwünne.

A üser Grenze git's nüt z'schmolle, – für de Trump de Tatterbolle
Denn eigentlich het er solle, – si Gammelfleisch verzolle.

Goht die Abstimmig denn in d'Hose, – fangt denn z'Kesseli a rünne
E halbe Radio, halbe Fernseh, – gits bi SRF denn z'gwünne.

Wottsch au by uns bänggle?

Uff www.vsg-basel.ch erfahrsch meh!

Fasnacht 2026



S Daameryschli

Dr glaini Kevin goot zum erschte Mol in e Bordell
Was är für sy Batze griegt froogt är s Mademoiselle
Sii schiggt en wiider uuse: «Bueb, gang du ab uf d Pischte!
Frühfranzösisch hämmer ebe nimmi uf dr Lischte!»

Bi de Affe het dr Zolli Noochwuggs könne verbueche
Vyyli hän das härzig Dierli grad sofort welle bsueche
Dr Ludovic Magnin isch sy Götti – doch so nääbebyy
Könnti dä vom Uusgsee här au grad dr Babbe syy

Im Jura het me uns drei nit in d Badi yyne gloo
Dr Gilbert sigg e Peebler und e z grosses Riisikoo
Er heig e Waffe in de Hoose – doo hän mir zimftig afoo lache
Wie ka me so e Ufstand wäg däm Sääbeli go mache

«I greas you Döneld, sis is Karin, can we talk e bitzli
Das Thema mit de Zöll, isch sicher nur e Witzli?»
«It's fully ärnscht Miss Käller Sutter: Y will this Batzeli haa
Usser if you let me mol an di Goldvreneli dra»

In dr Steiner Schuel hän si verdoorbeni Älplermagrone gnosse
Das Ässe isch bi alle glyy drufaabe ruggwäärts gflosse
«Dasch nit so schlimm, mir hän e Leesig», het e Leerer gsproche
«Jetzt wird dr Name nimmi danzt, sondern halt erbroche!»

Die Ambience an dr Fraue-EM het uns super gfalle
Fraue geege Fraue kämpfe um dä Balle
S liggt au niemer ab wäg me glaine bitzeli Wee
Und so vyy! Rossschwänz hämmer bi de Männer no nie gsee

Schwaissfiess ka me guet mit me Fuessbaad therapiere
Und bisch du mit dim Gsicht nit zfriide, kaschs jo operiere
Mit Zuugsalbi sin Aitergschwiir au scho glyy verschwunde
Numme gäg d Schliimerei vom Infantino het me no nüt gfunde

Dr Macron wott bewiise, ass sy Frau au wyblig isch
Drum leggt är vor em Gricht grad d Faggte uf e Disch
Är heigi sii unglaublich gärn und findi sii so nätt
Und s wär em wiirgglig ganz egal falls sii die grössere Eier hät

Mit Laubbleeser derf me z Ziiri– sii jetz mien si loose–
S Laub nimmi vom ainte Egge in andere iinebloose
S Gschrei isch gross, denn wiider glai, schliessligg ischs verpufft
Und aimoll mee goots bi de Ziircher numme um warmi Luft

Wär isch ächt in Louvre yyne und het uf liise Soole
In dr Zünipause e paar Kronjuwele gstoole
Dr Ex-Prinz Andrew ischs nit gsi will allem Aaschiin aa
Hät dä Gryysel sicher – au no – d Mona Lisa abgeschleppt ghaa

Dr Parmelin het Biecher gwälzt, Fachliteratur studiert
So hän syni Zollverhandlige doch no funktioniert
Er heig drum vor em Dräffe mit däm Trumpelwäase
Jewiils däägligg 2 bis 3 Globibiecher gläase

E Baasler Politiker het grausam reklamiert
Är het dr Straal vo de Dringgwasserbrünne kritisiert
Dä spritzti in die falschi Richtig und duet sich nit bewääre
Liebi Männer! Das mit däm Straal probiert me euch scho lang z erkläare

D Kisscam die het zwai verwitscht, wo nit hätte derfe schmuuse
Kameras sin iiberall– doo kunnt dr Sittesprung schnäll uuse
Z Amerika het me Affääre friener nit so schnäll entdeggt
Die hän sich wie bim Clinton halt no unter em Disch versteggt

Das mit de Bliemli und de Bienli isch nimmi so modäärn
Hit hän au Bienli Bienli und Bliemli Bliemli und Bienli Pilzli
und Bliemli Fischli und Fischli Pilzli sowie au Bienli gäärn
S git Bliemli, wo wänn Pilzli syy und s Bienli fühlt sich nei as Broot
Kai Wunder, dass es so schlächt um d Geburteraate stoot



Wottsch au by uns bänggle?
Uff www.vsg-basel.ch erfahrsch meh!





Fasnacht 2026

Wotsch durch Birsfælde, losch de Charre besser stoh,
Susch wird dr glatt e Lappe us dr Täsche gnoh,
De Carlo meint s isch e seich, goht in d Ochsegass gediige,
Und loht für meh Verchehr, nume d Hälfti liige.

«Gäll, de gsehsches» frogt mi s Röögli uf dr Strooss,
«die Extrakilos, bini ändli loos!»
«Isch das das Ozempic», frogi intressiert,
«Nei das isch d SRG-Diät, wo me alles halt halbiert.»

Pink erluchtet stohter uf em Fuessbalfäld.
Für das zahlt är em Abwart ganz viel Gäld.
Wenns em Rase hilft, denn au däm arme Tropf,
doch es wachst em Shaqiri, nume Gras jetzt usem Chopf

«KI wird euch ersetze», seit mi Neffe überzügt.
«Für fascht alli jobs bruchts bald keini lüüt!»
Nur är bim Tiefbauamt isch sicher, und das macht au Sinn,
Sone seich wo die plane, isch in keim Programm drin.

Mit dr Ränte dueni em Carlo e Reisli schänke.
Pack em si Sagg, und säg, due an mi danke.
Zoobe chunter zugg, het ganz chrummi Bei,
S het glängt uf Walliselle, und denn wieder hei.

Wirsch hundert z'Ängland, chunt e Brief vom King,
Mit nätte Wort, und me Gryessli drin.
Wirsch als Meitli 16, und das isch nid gloge,
chunt prompt e Brief, vom Ex-Prinz Andrew gfloge.

Mit stolzer Bruscht, lauft dr Trump in Garte,
zu de Medie, wo dört brav dien warte.
«D schwiiz het kei Tarif me», seiter überfroh,
Är het dr Friedenspriis vom Schwingerfescht bikoo.

All fufzäh minute fahrt, uf Lieschtel jetzt e Zug
Nur zäh Minute fahrsch, d Zyt vergoht im flug.
Wenn mi Rächnig jetzte stimmt, denn ischs zum Glück eso,
chasch nach nur fünf Minute, wieder Heime goh.

Dr Schwingerkönig sitzt im Flugzüüg wuetentbrannt
grummlet liislig, «nei das isch doch allerhand!»
Bim wisse Huus denne akoh, brennt em öppis dure,
nimmt em Trump dr Priis ewäg, und haut em ein uf d Schnurre.

Schmuusisch am Konzärt, hesch di Job verlore,
E falsches Wort im Netz, sorgt das für Furore.
Überwacht uf Schritt und Tritt, nüt chasch dr me erlaube,
usser im Louvre, dört chasch dr schmuck ganz eifach chlaube.

Mit em Amipapst, zieht es resti in Vatikan,
McDonald's eröffnet mit me bsundere plan,
s reduzierte Sortimänt, das schloht ii wie ne Pfiil
S einzig wo's git isch natirlig s Happy Miil.

«Ghaue oder gstoche», frogt mi ein am SBB,
«keins vo beidem» sagi, «nei das duet doch weh!»
Es ghöri halt dezue, das sig nid nur Gefasel,
Druggt mr e Flyer in d hand, «Welcome This Is Basel»

Kei Service Public sigs, wo s SRF duet mache.
Es bruchi Sändig, wo informiere und me cha lache...
CH85 0076 9401 8020 1200 1, Twint wurd no au geh,
mir dank jetzte scho für euri Serafe.

Wotts au by uns bänggle?

Uff www.vsg-basel.ch erfahrsch meh!



Fasnacht 2026

s'KällerDüürli

Ich mecht das Joor em Trump mol huldige
und mi fir mi Väars letscht Joor entschuldige,
Ich ha däa denne ganz unvermittelt,
als debiile Orang-Utan betitlet.
S passendere Dier – mit sine ganze Tiraade
wääri dr Elefant im Porzelaanlaade.

Die Taylor Swift het dr Schritt jetzt gwoggt
und sich mit ihrem Gspuusi verlobt.
E Stadioon fir d Zircher isch nooni in Sicht,
will d'Yysprooch zieht sich vors Bundesricht.
Die zwai Sache hän gmainsam doodrbyy:
Es goot mr baides extreem am Arsch verbyy.

An Petarde im Stadion schaide sich Gaischter
doch gheere sie zu unserem Schwyzer Maischter
und schiesst dr FCB wiidr emool e Gool,
denn fyyl ich mi im Pyyro-Nääbel wohl.
Aber zind ich e Zigarette aa, maint links e Idiot,
«Hesch nid gwisst, es isch jetzt Rauchverbot!?»

Minere Familie hanni nyt uff d Wiehnacht gschänggt,
und dr Noochbere d Brämse am Rollaator usghänggt.
Vor Kinder gang ich bi Root yber d Stroos
und lift nid nacheme Gschäft – ganz groos.
Drumm han ich jetzt au – ganz äfach esoo,
vo dr FIFA e Friidenspryys bikoo.

It is verpöönt to have a Vollsuff,
and don't pick Röppli vom Boden uff.
If e Glygge crosses please be nice,
leave them the Vortritt, jetzt ooni Schaiss.
Thank you, dass du am Cortège nid dränglich
and for reading the Rädäbäng in änglich.

Ich ha letschti bi dr Bangg e Kredit ufgnoo,
derzue d Pensioonskasse uszaale loo.
Ich spaar an allne Egge, wonni nur kaa,
aber finanziell, do bini am Aaschlaag draa.
Und das alles numme, dasch verzwiggt,
will mi s Navi amme duur Birsfälde schiggt.

Mit häärzige Kullerauge vornedraa,
glotzt di jetz s Drämmli so saubleed aa.
«Mir sueche dii!» wott is d Laitschtell saage.
Die Ironie, die kanni nid verdraage.
Liebi BVB, ihr miend mi nid sueche.
Ich wart an dr Haltschtell und bi am flueche.

In China isch dr Bettspoort ganz e dyyre,
will die dien deert jetz Kondoom verstyyre.
Do muesch dr vorhäär guet budgetiere,
ob de bim Höhepunggt wotsch assischiere.
Ich verhiet ganz natürligg mit mim Drache,
indäm ich im Schloofz. gang go Liecht aamache.

Bim WC-Papier, doo bin ich haiggel.
Ich hass so gschmirglets us Recycle.
Dooopellaagig und und waich, das macht mi froo.
Das isch guet fir d Hut und schoont mi Poo.
Drumm find ich s schaad gits als Option
S «20 Minute» nimm in dr Printversion.

Dr Kassesturz sait, i dues nid schnalle
die beschte Läggerli gäbs in dr Migros St. Galle.
Ich ha jetz au – liebi Oschtschwyzter Frinde –
e Studie gmacht und kaa hyt verkinde,
denn isch die Diskussioon ändligg vom Disch,
e Brootwurscht schmeggt besser wenn Sänf druff isch.

Wottsch au by uns bänggle?

Uff www.vsg-basel.ch erfahrsch meh!



Elfi-Glöggli 2026



Do findsch alles
über uns,
au d Värslì:



Wottsch au by uns bänggle?
Uff www.vsg-basel.ch erfahrsch meh!



FASNACHT 2026



Rechnungsnr. 0001

Tisch 0001

Hütt hanni verschloofe - mi Chef hett's nit grafft
Vor mim Huus het die scheiss Baustell, am Morge nit
gschafft

Ich kenn ein wo's Münz - in de Unterhooose umme treit
Syt denn weiss i worum, me däm Sagg-Gäld seit

E RUNDI Zerli 17.40

Sie sinn allergisch uf alles - wie Gluete, Nüss und Ei
Do frogg mi wieso, bliibe die nit dehei

Die Abnämssprützi, zeigt Wirkig - und het ihre Reiz
Für uns isch das super, 4 Tisch meh in dr Beiz

SCHNIPPO 35.90

Letschti froggt mi e Gascht - wasi würd empfäähle
„Ich würd Heim go ässe - wenn i könnt wäähle“

„Syt 10 Minute do wink ich“ - im „Schluch“ am Tisch 7
Do seit die: „Ha gmeint hesch nur d Fliege vertriebe“

„GO BASEL GO“ - e gueti Idee, so im Grund
Aber wie will me denn GO - wenn kei Drämmli me kunnt

Die LETSCHTI Rundi Unbezahlbar

Ich bedien Di vo links - vo rächts vo vorne, und hinde
Für dä Priis muesch in dr Wää-ber-gass z'erscht eini finde

FLÄSCHE Champagner 145.00

TOTAL : ..s'LACHE..
Inkl.MwST : ..20,26%..

TRINKGÄLD via Twint

Wottsch au by uns bänggle?
Uff www.vsg-basel.ch erfahrsch meh!



Fasnacht 2026



ARTIKEL	MENGE	PREIS
E hampfle Värs	11x	141.65
Buess	1x	100.00
Eier	2x	2.50
Instandhaltig Mamme	1x	100.05
TOTAL	CHF	1763.20
MWST (8.1%)	CHF	105.80
ENDSUMME	CHF	1906.00

Do kunnt ein in Laade – los ich veregg
und verlangt e Rolle Bebbi-Segg
Es isch mir unagnääm aber ich muess em gstooh.
Fir so Luxusartikel muesch in Globus gooh.

Vor däre Durchfaartskontrolle duets mi Noochber gruuse.
Dä het in Birsfälde nämmlig e Schätzli miteme groosse Buuse.
Wenn si jetzt wieder emol e heissi Nummer starte,
muess-är nach däne 2 Minute, no 13 im Auti warte.

Dr ESC heig weniger Abfall als d Fasnacht hinterloo.
Das freyt mi, nur kann-i das nit so lo stoo.
Firs entsorge mechti e markante Unterschiid nenne.
Dert dien Röppli nämmlig besser als Pariser brenne.

Ich ha dr Jeba bsuecht im Basler Zolli,
dä neyi Silberrugge dä stolzi, tolli.
Ich fordere, will er isch em gaischtig wiit voruus.
Dr Yeba ins Wisse und dr Trump ins Affehuus!

Mit däm Chlorpoulet het mi Omi e Suppe kocht.
Drum het d Mamme e Wuche uf dr Schissi verbrocht.
Gschmagglic, farblig duets grad passe.
Jetzt kriegsch bi uns Matcha Latte an dr Kasse.

Mi Kund, e Ziircher, jommeret: Zweifel sott me boikotiere.
Will si dr Stadionbau in Ziiri sit Joore blockiere.
Gsehni wäg däm e Tränli yber e Zircher Bäggli laufe,
dueni doppelt so gärn Aromat Zweifel kaufe.

Uf OF hets e huffe Flittli.
Fir 20 Fr. täglich Föteli vomene scharfe Schnittli.
Woni zaahlt ha und ufem erschte Föteli land,
gsehni d Mamme blutt ufem Kasseband

Dr Erik Wäber zur Tyr ich kunnt-r.
Wie mi Doggter seit das medizinisch Wundr.
Er frogt sich: yber weli Kerpereffnig nimmt dä d Naarig ihh?
So vill scheisse wie us dr Schnure kunnt, könns die nit si.

Wie dr Zolldeal z Stand ko isch, dien-mr untere Deppig keehre.
Wichtig isch aber, dass mr us Fähler leehre.
Fir die näggscht Verhandlig wärs gläb nit verkeehrt
wenn me d Sutter Karin in Käller speerrt.

Au dis Joor derf Israel am ESC teilnääh.
Us Protäscht het Nemo dr Pokal zrugg gääh.
Das Bewiist doch, do machi jedi Wett,
dass dä doch no sini Eier hett.

Woni mit mim glai Neffe vorem Laade stand meine mr,
dä Zombiewalk sig dr Cortége vo de Stainlemer.
Do seit er: Nai Unggle, so primitiv und gruusig,
da-sch dr Bummel vonere Guggemuusig

Wottsch au by uns bänggle?
Uff www.vsg-basel.ch erfahrsch meh!

